

Fünfdausend sinn all satt worr!

Jesus zu seine Jinger saat:
Wann ich eich aguckt, mään ich grad,
ehr braichten jetzt e bissje Ruh.
Drum ab ins Boot un rudern zu
dem stille Plätzje in de Bucht,
dort, wo uns heit niemand mehr sucht!

Doch als die in das Boot gestieh,
do hann das a die Leit gesieh
un sinn gerennt wie bei ner Hatz,
un warn vor'm Boot am stille Platz.

Das Boot is dann a glei geland,
die Jinger springen an de Strand,
doch wollen se glei widder geh,
weil do so mordsviel Leit duhn steh.

Doch Jesus saat: „Bleiwe nor do,
die Leit, die sinn do hergezoo,
weil se mich woll'n rede heere,
des kann mer denne net vewehre!“

Un er erhebt sei Stimm sogleich,
verzeehrt vum Babbe un sei'm Reich,
die Leit heern zu mit offnem Mund.
Paar Kranke macht er aa gesund.

Er red und red un werd net mied
bis an die Nacht. Un als er sieht,
dass Kohldamp griehn die Leit do drauß,
do guckt er sich de Philipp aus
un saat zu'm: „Du, griehn mer die satt?“
De Philipp is zuerscht mol platt.

„Vun was dann, Chef, des froh ich dich?
Fünf Läbcher Brot un grad zwä Fisch!
Das langt doch niemols fer die all.
Kumm, schick se häm - uff jede Fall!“
„Nor mol langsam un net haschte!
Wann ich do bin, muss känner faschte.“

Dann nemmt er's Brot un die zwä Fisch,
zum Glick is alles ziemlich frisch,
macht lauter mundgerechte Happe,
bedankt sich schnell noch bei sei'm Babbe.
Un - leck mich: 's langt fer all die Leit.
Fünfdausend an de Zahl sinn's heit!

Das Esse scheint net all se werre.
Am Schluss duhn se zusammescherre
die Brocke, die wo iwwrisch sinn
un stoppen se in Kerb eninn.

Zwölf Kerb mit Krimmele un Gräte,
voll bis owwehie.
Do duhn die Leit noch dabber bete,
weil, sie hann gesieh,
dass so e wunnerbarer Mann
nur de Sohn vun Gott sei kann!

Lied danach

Melodie: Am Rosenmontag

Fünf Läbscher Weißbrot un noch zwä Fisch dezu,
mehr hot er domols jo net gehat.
Un mit dem bissje, do hat er griecht im Nu
fünfdausend Mailer ohne Schwierichkeit satt,
fünfdausend Mailer ohne Schwierichkeit satt.

